





松石齋集  
七



松石齋集卷之一目錄

五言古詩

文華殿進講大寶箴 上起立以聽恭

述

送符卿徐伯繼請告歸信州

初夏齋中述懷二首

送王胤昌太史省母還汝南二首

望岱

登半嶺見日始出



送顧吏部請告南還

送熊茂初再調河南戎幕二首

送張錦衣南使還蜀

賦得蕭比部寶綸樓蕭嘗夢白衣道人

指所構樓地樓成適符厥夢索予賦

此

端陽前一日全大宗伯王公大司成張

公學士余公少司成劉公邀少宰羅

公汎舟石頭城南觀競渡得忠字

送郭府丞赴北京兆

沈光祿鏡字太樸園詩

別汪仲輝

檜峰詩贈李參軍

送黃懋忠太史使封唐府暫還嘉禾四

首

七言古詩

恭題 成祖所御四馬歌

鳳臺吟送嚴道徹 赴舉



汶水吟贈于進士子步

游雲龍山遇雨酬莫副使

馬邑行送蔡侍御時鼎赴謫縣尉

薊門行送鄒吏部請告還吉水

緩歌行送熊茂初僉臬福寧兼柬吳宮

諭趙憲使二子

婁東逢吳子道作

太白樓對月訓高憲使蓋卿時予方乞

休

南池歌柬高憲使

春雲篇寄贈余少府明俊

題楊尚書畫竹送方生還揚州方時將

卜居白下

昔時行贈王超宗

丹泉詩

王大宗伯示所居四景圖輒詠四首

文筆晴烟 金鷄春曉

石隴馬鞍 溪橋碧水



送董山人遊西岳

文華館

松石齋集卷之一

海虞趙用賢汝師父譔

五言古詩

文華殿進講大寶箴

上起立以聽恭述

聖人握大寶望道心無疆法古治所貴啟沃資  
 前芳伊昔貞觀初親儒盛文皇爭臣寔司直垂  
 訓明且長盤孟昭炯戒帝道古有光采之備箴  
 誨藉以時言颺皇心夙予警宸聽何琅琅當  
 展起延竚如嚴在羨墻瓊臺鑒其侈糟丘念惟



狂牽裾表魏帝吐哺稱夏王帝衷鏡往事保治  
若履霜曰予能守位天鑒亦孔彰丹書戒怠勝  
五子歌內荒典謨苟不泯茲訓其可亡惟臣侍  
密勿講幄承趨躒冰兢切宵慮聖學真日強持  
此紹往烈媲美駕禹湯作頌希虞庭千古徵明  
良

送符卿徐伯繼請告歸信州

秋色有佳興何期及君離蒼茫易水上落日壯  
士悲青絲絡紫騮駢駢轉路歧路歧臨當盡握

手重遲遲夫子有盛才貞心冰雪資文章作代  
桀經緯稱世師念昔青瑣賢讒構遭磷緇飄零  
未死身報國矢策竒流水非鄭曲太音寔寡知  
楚人不辨玉三刑安所辭嗟嗟漁陽地秔稻雲  
帆馳安知灌舄鹵決渠仰金堤武安戀食邑徒  
嗔鄭當時謀國苟如此君何獨惻惻黃金鑠衆  
口蛾眉難爲姿白駒繫空谷賢人徒嗟咨千金  
買駿骨騏驥鹽車遺魚目往見襲明珠徒爾爲  
我非彈冠人感別增煩思煩思鬱以紆對君還



自怡道場古龍虎瑤草山中滋君今闕林壑緇  
錫好自隨倘悟真如旨人間任所之

初夏齋中述懷二首

融風拂晨霄花雨散輕馥白堤多鳴鶴東臯展  
種稜念此物候移遙情軫芳淑徘徊空堂上素  
心媚幽獨悠然西山雲流暉蕩巖奧物化非營  
營委順無不足惟以開沉憂披襟會遐矚

青春始摧謝灌木滋繁陰落花棲草際流鶯語  
深林開窓啟玄覽獨見萬古心虛薄寡世資種

種白髮侵逝波日渺渺因之與浮沉撫辰叱往  
志幽思懷鳴琴飄然紫霞想羈紱盈緇塵

送王胤昌太史省母還汝南二首

良辰戒商序戚戚傷遠離遠離迫衷懷惜此歡  
愛移平生結交誼婉戀心獨知華燈開中堂樽  
酒聊相遺極夜不成醉仰視明星稀明星何歷  
歷僕夫理前綏念爲參上辰咫尺懸路歧鴻鴈  
雲中哀顧影以踟躕思君何能已泣下如縷  
出自都城東南顧返義陽登高望大河大河水



泱泱遲遲前途盡依依慈母傍入門拜嘉慶物  
色桑榆長子行愜歡願我獨嬰憂傷已矣各去  
任聚散安可常永絕賞心悟側目希流光義言  
多苦調峻志潔秋霜允願崇明德終期令名揚

望岱

驅車越修塗明星晨未爛綿邈欣遐矚靈嶠造  
天漢游陰被霞石飛清起雲觀連嶂旣截嶽蒼  
翠亦陵亂松塏懸晴暉鳥道倚伏竄緝宇秘中  
巖恍忽景耀判肆睇周八隅神秀啟震旦冊府  
亟金書流丹骨可換竦踊企璿房凌風假羽翰  
大游何道遙喟彼市朝玩

登半嶺見日始出

景岳絕地險層秀凌二儀遂登千尋天俯睇若  
木枝角宿耿未旦曜靈發晨曦一氣鬱黯黯霞  
光忽中窺離離散丹彩煜爚滿四垂城堙暗遠  
霧積水浮天彌皎潔澄上方峭蒨隱半規昏燒  
晷莫辨倒景驚西馳憑高企寥廓萬象開羣竒  
窈冥覩光怪超然蕩煩思躡足附紫霄飄遙駕



雲旗挂弓扶桑側解羽安可期

送顧吏部請告南還

平生寡交游投分子獨深衆中見顏色躡足賢  
豪參曰余本頑疎年髻且復侵屢陪瑤華論相  
照許寸心涼風動高闕九月燕臺陰念子重離  
別對酒不能斟下馬秋庭寂城柝夜沉沉朝辭  
南曹寵夕返北山岑仰視明星麗參辰竟難謀  
志士感夙抱嗟此賴光尋悠然梁溪下端居抒  
煩襟丈夫豈遺世乘運當爲霖賞心宿有在戀

子丘中琴莫以淒涼故投賦輕千金去去循堦  
除悵望懷良音

送熊茂初再調河南戎幕二首

仲冬寒氣烈蕭蕭林木虛霜霰被道路送子夷  
門墟夷門古俠隱尚識侯嬴居市朝忽陵谷冠  
蓋多籛篠薄俗委悠悠世路其何如以子含清  
貞駭目將睢于悵別各千里把袂分躡蹠嫋嫋  
一寒騎望遠深愁予子行慕袁盎浮沉並里閭  
努力苟如此豈嘆相携疎



垂老宦未達蹭蹬梁楚間念昔厲羽翰青雲共  
躋攀一落緇磷口十年承賜環相看各自失把  
酒開頽顏窮冬薊門道白雪明高山以此流水  
意送君何潺湲流水本無情思君鬢成斑緱嶺  
有笙鶴相望嵩丘山

送張錦衣南使還蜀

翩翩佳公子逸氣陵紫烟三十執金吾登壇衆  
推先子侯詎言貴小許仍象賢春風駛驥馬夜  
帳孫吳篇朝來謁天子詔書明光宣遠游事

結束組練明秋筵落日潞河遠蕭條江上船路  
向巴山盡心從蜀道縣那知故人意別思搖風  
前明年征旆返薊北正青天

賦得蕭比部寶綸樓蕭嘗夢白衣道人指  
所構樓地樓成適符厥夢索予賦此

白衣啓靈機仙居開其兆帝命錫嘉名寶綸  
實始肇武姥鬱崔嵬當軒青未了間之淇塘流  
層波遠浩渺蕭子綿邈姿心期出塵表危榭引  
高風虛櫺曠飛鳥朝光澄日華夕景汎幽渺顧



茲君親恩端居思獨悄永念松谷公堂構力非  
小時欣榮問滋回睇三山杳高樓多仙人羽駕  
肅縹緲千秋樂未央陰陽自昏曉

端陽前一日同大宗伯王公大司成張公

學士余公少司成劉公邀少宰羅公汎

舟石頭城南觀競渡得忠字

朱明肇佳節金堤麗芳釐端坐無餘念回思故  
林中鬪茗春山下蕩槩溪橋東忽枉宗伯顧邀  
賞愜素棕瀛洲二三侶忝陪塵外蹤瑤軒臨水

曲登臺四望同管絃圍永晝羅綺嬌春風寶馬  
嘶不息午聲何隆隆須臾橫江上方舟躍五龍  
鼓音劈浪湧舞勢排雲空揚桴亂流進烟霧紛  
濛濛岸上冶游者揮手如飛鴻踏歌連袂起川  
渚凝粧紅西迷白門柳東指清溪宮宮柳晚依  
依歸騎鳴瓏璫繁華盛戚里嘉惠足數公高帝  
雄謨在時清道方崇但令歌舞地歲歲歡相逢  
毋爲懷屈賦千古弔遺忠

送郭府丞赴北京兆



籍甚黃京兆危言自昔年乘驄威舊肅歌袴咏  
新傳共喜燕臺詔還徵郭隗賢吾君思側席都  
輦化鳴絃暮雨石頭急春潮浦口平佩符雄此  
別臥轍故堪憐霄漢瞻佳氣弓旌及遠天自茲  
幽仄者應共被登延

沈光祿鏡宇太樸園詩

達人悟無始寄情在寥廓本爲青雲姿自擅乃  
一壑太樸何臃腫匠石釋斤鑿用大衆所拙我  
獨契冥約旦暮閒園裏寢處恣盤礴五石浮江

湖何事憂瓠落山中雁不鳴幸不潤鼎鑊逍遙  
我無爲與爾游廣莫榮華俛仰間膏火競相鑠  
勛業齊唐虞萬古亦一燭何如葆貞素逃虛寡  
形縛太樸名吾園吾名爾永托

別汪仲輝

客從新安來棲遲白門路旅食非悠悠朱門寡  
良遇彈鋏歌將歸驚人句徒賦綠芳幸未歇及  
子逢春暮饌酌席屢移高襟暢玄素俠骨歿猶  
香黃金貧不顧楊柳鳳臺烟桃花秣陵渡相逢



復相憐歎息非今雨望望三山雲渺然愁心駐  
檜峰詩贈李參軍

亭亭山上檜鬱鬱含竒姿孤根得所植凌寒色  
不移哲士懷貞心因之托遠思結廬高峰下林  
莽相蔽虧蒼翠日在眼靜嘯煩襟披放情陵霄  
外顧步矚五芝但保幽獨操市朝非繫縻毋爲  
桃李顏坐歎芳菲時

送黃懋忠太史使封唐府暫還嘉禾四

首

昔我游京國握手多時髦弱植慕端操縑綵托  
素交君子委芳訊傾盖良一朝承明相出入風  
徽日以陶結意向千古晤言獨寥寥逝景促別  
會纏綿憂思勞憂思在遠道四牡揚朱鑣安得  
齊衡軌與子同翔翺

駟牡何駢駢駕言適宛洛展禮世五宗唐封肇  
光宅授簡賦梁園菁華映昭燭列樂陳歌鐘明  
月照緹幕采筆馳縱橫逸氣秋旻薄良儔不獲  
偕舒情安所托循念昔者歡怒焉傷離索



嵩印有仙室三華秀瑤艸循彼南陔情掇之後  
天老迴轅軫南翔望塵一何渺行旆引江花吳  
天白雲杳入門承歡顏榮名洵已早游子多苦  
辛聊因偃幽抱修業在及時終然永相保

巖廊豈不戀湛思契冥筮却掃捐百慮歷覽該  
羣言敷文妙華國凌厲躡馬遷駿功在鼎鉉調  
燮資大賢刻意藉獨往靜惟緝化權跂予旅文  
館慕類情彌懸勤役佇將歸天路期騰騫念子  
沉心曲申報希瑤篇

七言古詩

恭題

成祖所御四馬歌

龍馬來翼 聖主鐵蹄蹄竹批耳蹠躩翔雲螭  
天矯攫乳虎當年鄭村戰其疾驟如雨朝摩九  
壘夜七營躡景逐電驚神行飛箭連錢貫鳧臆  
血染龍花逝猶力歸來歛控青門外 天子明  
堂坐北極五花雲錦吹東風蒲稍徒爲入漢宮  
右題龍駒戰鄭村壩乘此



騰星精降天房御軒后乘飛黃 聖主旣膺箴  
神馬如龍翔追風走滅沒顧影驚驕驤靈壁之  
戰何雄武南奔百萬若委土 帝躍此馬摧中  
堅權竒蹴踏湮長川良工貌出丹青中稜稜逸  
氣猶呼風嗟乎汗馬功勞乃若此 聖子神孫  
當念 祖

右題黃馬戰靈壁乘此

紫騮馬金絡月朝刷燕晡秣越渥洼竒種古難  
求生綃貌得千金骨紫騮呼青海風爲驅哀哉

小河戰十萬俱爲魚紫騮奔足歷浮雲翻竦身  
企聞闔客與游天門於今馬飽閑戰伐披圖神  
俊猶鬱勃吁嗟紫騮何不嘶入桃花去 天子  
方競朽索馭

右題紫騮戰小河乘此

駢馬黃金勒照耀桃花色鳴鞭渡白溝天地走  
霹靂飛兔一日騁千里今之此圖無乃是汗血  
猶憐色骨竒龍媒尚憶趁趕起昔時畫馬曹將  
軍拳毛寫出真絕倫穆滿當年歷西極空令八



駿留雄式豈如此馬乘飛龍躑躅長鳴磧壘空  
白溝原頭白骨淒天陰鐵騎風雨嘶鬼火青青  
血爲燭豈知此馬形容在麟閣  
右題赤兔戰白溝河乘此白溝天賦去  
鳳臺吟送嚴道徹赴舉

嚴仲子何翩翩朗行皎白玉高意凌紫烟汝本  
青雲相君子一生羞自言統綺著書好在薄長  
卿耽玄且欲窺李耳酒酣氣振吳市傍擊劒手  
挽三石強風雲磊落開浩蕩側身天地何茫茫

竭來三十未成名蹉跎猶困一諸生南風五月  
吹雪浪棹頭東去金陵城金陵城邊草色秋三  
山亂落秦淮流秦淮美人何處所緝或擢手凝  
高樓玉宮仙桂十萬斛飄向高樓作香玉采雲  
遙見仙人來九關瞳瞳魚鑰開手把綠玉杖謁  
帝遊蓬萊朝辭麒麟館暮宿鳳皇臺鳳皇臺上  
秋風早千年鳳去餘音繞看君長嘯臨高臺雄  
鳴一聲天地曉  
美人汶水吟贈于進士子步即謝飛人門下



美人家住汝水陰我往從之烟樹深入門孤興  
發清藹披襟爽氣澄高林于公門楣古來少况  
復青雲致身早建安詩句永和書紫芝眉宇秋  
空杳薦雄雖奏屬車篇報劉更抗陳情表歸來  
到徑掩荆扉抱甕軋軋渾忘機中郎坐上曾倒  
屣公子門前乍解駢錦瑟高張促絃柱繡幄低  
垂小槐雨黃昏木末動青蘋主人一尊情未已  
三十年來天下行客游無日不心驚風塵蹭蹬  
盱白眼憐君獨炤何英英汶水流本清河水流

至濁人心不同若此水對君肝腸差可燭別有  
荆卿一片心易水風寒空刺促

游雲龍山遇雨酬莫副使

山雲莽莽鬪龍虎黃河倒天天吳舞帝遣河山  
闌九土神州蒼茫空一俯君不見昔時彭城置  
酒會高祖楚兵西來決破釜睢水不流太公虜  
又不見戲馬臺南走項羽大阜青青埋亞父虞  
姬夜帳泣如雨千年王氣鬱膺膺芒碭龍成雲  
不聚方花古礎剝幽廡蛾眉綠曼銷歌縷豪華



零落遞相主白石犖犖山色古須臾長飈蕩秋  
宇黑入太陰吼雷鼓豐隆砰訇列缺吐還如楚  
漢當年爭戰苦使君縮符紆五組談笑風雲淨  
樽俎荒城斗酒月當午田田桑麻盛環堵自從  
洪河凌競莫神禹年來蕩滂成斥鹵壁馬日沉  
輪內府使君籌前若策數一一河流掌中取坐  
令歡聲開萬戶轉漕百萬啣樓櫓寶劍揚眉笑  
一撫雄風瑟瑟西陵樹明堂天子四照普河山  
永奠鎮神武

馬邑行送蔡侍御時鼎赴謫縣尉

朔雲橫天天欲低胡沙獵獵吹人衣漢家邊城  
重馬邑年年虜騎窺山西飛書插羽奏明光鳴  
鉦疊鼓開邊場逶迤關塞五千里烽火何處無  
鏡槍自從永樂三犁穴世宗皇皇張六伐長纓  
繫頸五单于闕下爭看走降節呼韓罷款携日  
逐胡兒嬉騰飽梁肉授鉞將軍帳底眠乘城壯  
士山頭哭山頭日日望征塵白草淒淒不見春  
魏尚雲中誰首虜聶翁塞下無豪民邇來聖



主勤籌邊拊髀思得將帥賢蔡子封章叫閭闔  
豸冠摩雲高觸天一朝天子顏色改投荒直  
向陰山壘昔時杼軸舒東南今見澄清傳瀚海  
桑乾冰合馬蹄脫夜半風鳴戈相襖楯鼻馳書  
墨好磨不獨匈奴氣先奪送君白雲滿郊原擊  
筑還傾燕市尊 聖明自是能容直鎖鑰須君  
任北門

薊門行送鄒吏部爾瞻請告還吉水

薊門五月飛嚴霜浮雲翳日天無光城南柳絲

千萬縷一一爲綰離人腸離人鞍馬去紛紛徒  
倚斜暉獨送君心隨揚子磯邊水路指滕王閣  
上雲世人翻覆雲水情肝膽向人誰可傾憶昔  
九關嚴虎豹與子抗疏下雷霆我投南服袞瘡  
痍七年遠戍君羅施鏃骨丹心未消血鑠金衆  
口還成箕賜環乍許游華省封章再忤忠逾耿  
鳳凰臺前春草長鳳歌且學幽人屏我行白下  
返郊丘連床夜雨同孤舟涕泣空懸賈生淚江  
湖獨抱希文憂我賦歸與未遂初君從幕下起



徵書共道山濤能啟事繞朝拭目看公車由來  
絳灌怒難逢當場優笑紛誰憑崇闌化筌玉爲  
砮吞聲志士其常窮慷慨逢人不易言悲來相  
向獨相憐神武衣冠稱見早穆生城旦明幾先  
羨君冥冥靜者心飄然高臥螺川陰少年不爲  
窮章句清時豈合終山林男兒七尺萬古身莫  
令白髮蹉跎新我亦名場澹蕩者拂衣且作同  
調人章水東流入九江雙魚日下下潯陽明年  
若到匡廬訊與子峰頭問向長

緩歌行送熊茂初僉事福寧兼柬吳宮諭

趙憲使二子

江水二月平江花三月滿春帆消息幾時還當  
杯不惜離歌緩與君三十謁承明相看意氣山  
可傾問竒何事非揚子凌雲有賦誇長卿蛾眉  
入宮誨羣妬鳳皇高飛鷄鶩聚江潭一斥餘十  
年誰憐賈傅懷沙句風塵垂白未逢時歷落巖  
嶇君亦苦去年新從蜀道回我亦返駕城西猥  
爭言白壁非懷褐共道黃金且築臺白壁黃金



空自好涓人買駿何草草眼底紛紛魚目珍誰  
人解辨連城寶和歌差作酒人泣酒酣氣振髮  
倒立豸冠乍識臺端雄荷衣旋擬山中緝梨花  
香月下長洲錢塘垂天水拍浮毘陵城南吳子  
宅平生肝膽差可析西湖地主得趙君湖頭行  
春騎若雲唾壺擊墮青天月千里相思坐超忽  
都亭楊柳晝絲絲行人馬首斜陽遲舉鞭揮袂  
忽不見龍劍延津會幾時

婁東逢吳子道作

柳絲三月壚頭長吳姬當壚壓酒香逢君婁東  
解鷓鴣一醉累日傾肝腸海雲障天天茫茫起  
舞四顧心徬徨烈士悲暮年不惜委道邊所嗟  
青雲器宛轉溝壑捐古來悠悠皆若斯一沉一  
浮會有時我歌獨漉詞進君金屈卮扁舟散髮  
泛鷗夷何如富貴履危機送君此去姑蘇道藤  
蕪綠滿芳洲草草長門逕不可尋巖畔從君苦  
不早

太白樓對月酬高憲使蓋卿時余方乞休



昔聞李青蓮玩世稱謫仙徂徠山南濟水北竹  
溪遺跡今茫然我方濟北登高樓齊州九點青  
悠悠掉頭不見孔巢父當壚猶憶董糟丘知章  
不語太白笑屋梁落月丹青幽層城沉沉嚴夜  
拆疎簾杳杳披明河明河流雲迴倒影西風入  
幕生微波待乘黃鶴去試聽青天歌青天有月  
萬古新綺羅偏照豪家春璇題綉柱三千帳輦  
玉輿金十二輪共矜富貴常如此長繩繫日銷  
不死那知塵海變須臾繁華一旦成覆水自從

有樓月不改古人今人相伏倚長安依舊月紛  
紛還是清光不照君何處吹笙追子晉千年怨  
骨泣靈均帝閨不可叫肝膽誰向傾人間萬事  
填塞安足數惟有飲者全其名洛陽才子外臺  
端文章昔日同詞垣竭來東魯相逢劇十日高  
陽興未闌樓頭月上人先醉樓外霜飛月欲殘  
霜寒月白夜亭亭門前鞍馬如流星藉君一發  
沉冥至明日孤帆下洞庭

南池歌柬高憲使



松石齋集 卷之一  
芳月南池宴開尊曲水  
芳涼風當戶至吹暗藕  
絲香青軒樹轉月滿床  
零零白露霑衣裳故人  
相向語今夕冰盤膾鯉  
銀罌漿瀾瀾城南秋水  
長蓮花荇葉交橫塘夜  
半迴舟隨綠渚儂家江  
南樂未央江南信自樂  
濟北遙相望張華已沒  
雷煥死何人解辨豐城  
光吳絲蜀桐聲未歇漸  
看海日生精芒男兒放  
意且飲酒毋爲老大徒  
悲傷

春雲篇寄贈余少府明浚

春雲翳翳垂日脚  
婁江東頭夜潮落  
疊鼓鳴橈水上郎  
牙檣十萬圍朱幕  
茂陵野老識者稀  
短蓬孤坐親牛衣  
但聞江干車馬填  
不聞人覓孝廉船  
海內乃有汝南公  
超然心與靜者同  
謂予澤畔高偃蹇  
入門一笑披心胷  
下里驚聞段干式  
拂衣敢據侯嬴席  
高山流水子期心  
千載知音共相惜  
羸軀幸且弛漁釣  
青眼何人俯餘照  
余公意氣山可移  
反唇不作時相稽  
片言昵昵成莫逆  
使我長笑信雙眉  
明月啣來可報恩  
如



何魚目仍緇塵君不見蕭朱徒言結綬寵膠漆  
終輸雷與陳古人結交結在心不然白髮當如  
新雙旌南去擁春雲三月桃花吹作雨雨落在  
地雲上天別意能無歎離阻

題楊尚書畫竹送方生還揚州方時將卜

居白下

修竹楚江濱  
蓊含翠氛  
東風動地  
桃李妍何  
如瀟洒淇園君  
方生飄然靜者顏  
尚書貌與青  
琅玕不將高節污塵土  
祇抱貞心共歲寒  
君今

三月下揚州暮雨瀟瀟江上樓  
若到金陵訪鳳臺  
應知竹實鳳皇來

昔時行贈王超宗

紅顏昨始媚青鏡  
今忽凋歲月若俯仰  
奈何輕良宵我見王先生  
玉立頽然標風流  
千古高俠骨落筆雲霞何鬱勃  
金堤月滿醉娼家  
寶馬塵清馳帝闕  
昔年舅氏稱豪雄  
與君意氣矜相同  
北堂夜夜歌簾月  
南陌朝朝舞袖風  
歌簾舞袖歡未移  
年來七十遂忘機  
許身猶作高陽侶  
青



袍還着舊時衣城東年少日紛紛爭言桃李正  
氛氲昂藏誰識龍鍾老墊鶴終難雞鶩群君不  
見草頭露一朝辭條委黃土又不見海底塵仙  
人坐嘯桑田成看君丰骨老如此悠悠窮達安  
足齒與君更醉三萬場直跨蓬萊論甲子

丹泉詩

候月安鼎鑪丹光掩明月鋤雲石竇開濺濺梳  
石髮洗藥春深帶落花縈紆細艸亂晴沙何處  
羽人騎白鹿同爾吹簫醉紫霞

王大宗伯示所居四景圖命各作雜體詩

詠之輒賦四首

綠沉青鏤斑雉翎截玉新封重管城何如海上  
一峰立含烟吐霧開南溟東亭莫道夢如椽文  
筆王家世象賢尚書擲管振南服茫茫元氣相  
鈎連峰頭日日烟霞起黛墨掃天天可補須臾  
觸石寸雲生一洒商霖遍天宇

右文筆晴烟

君不見石隴山頭馬鞍石凌空歷亂五花色海



水直侵扶桑宮秦鞭驅之飲海東真人憑鞍顧  
盼間須臾汗血傾天閑天閑雲錦十萬羣金韉  
玉勒光紛紛請看昭王臺駿骨成塵埃海嶠一  
石空羣材如今天馬不自西北來

右石隴馬鞍

金鷄天上啼春山曉來白六龍啣燭飛闐闐千  
門闢明堂坐天子盈朝警絳幘風雨淒淒不下  
埽心隨黃鵠遊天池雄鳴一聲振毛羽丹穴歲  
蕤安足數但令四海致昇平聞鷄勸君莫起舞

右金鷄春曉

渟渟碧水炎洲西溪橋東去織林低蒼烟萬頃  
平玻璃神州南望九點齊學士高齋天半棲珠  
簾萬疊春波迷閒來杖策遵平蕪紅桃綠柳鶯  
亂啼朝雲南浦飛暮月西樓孤朝朝暮暮自霏  
微空今魏闕縣江湖丈夫得意懷良圖何能一  
壑守舊區

右溪橋碧水

送董山人遊西岳



風馭去冷然函關路幾千  
 漁陽三月暮芳草暗  
 秦川秦川漫漫烟樹阻  
 太華三峰高玉女醉拂  
 蓮花頂石眠狂携謝眺  
 驚人語羨君冥冥五岳  
 心金門莫笑空浮沉扁  
 舟他日江南去與爾相  
 期學向禽

*氣萬發春郊也開來以策  
 上燕珠將秋賦  
 高發天字通  
 天起舞*

松石齋集卷之二目錄

五言排律詩

便殿奏事 上念跪久降座以手引起

又蒙 天語嘉歎久之紀事

郊壇扈 駕賜觀齋宮温室又賜金椰

瓢銀入寶紀恩

奉贈肖父張大司馬

壽徐上相二十四韻

少林寺



贈石少司馬

贈南海曾士鑑二十四韵兼呈趙少宰

李權曹啓鑑荷亭新成有作

送秀上人自真州將至峩眉

五言律詩

題雲棲寺

輓轅嶺北望

五言 贈崔道人清言

陽臺宮作是司馬子微成道處

秋日借韓存良吳子道二太史游西苑

枉詩見投奉和得十首

華嚴寺

晚渡衛河

送傅大理之南都

奉使出都宿潞河寄別故知二首

奉和張學士洪陽先生閒雲館詩八首

送蕭給諫使封琉球

送陳錫玄文學之南雍



潞河留別張以孚張時左補闕

平原留別曹戶部

送寬上人

林居

阻雨大河宿塵上人禪院

焦隱士祠

早發寧陽

晚過碧雲寺

訓尉氏令

玄谷寺題贈方乘老僧

謁夷齊廟

會亭驛阻雨

天津逢沈太守

早涉伊川南歸

送潘去華理郡溫州

送劉應楠理郡永昌

送刁宇和尚游五臺

丘齊之吾無全成奉和四首



賦得露零仙掌

玉泉寺觀魚

三竺

送劉生還天長時予將赴闕

贈醫尤生

毘陵道中家弟餞別

登江天閣同送別諸友

仰雲詩

半塘寺訪圓上人

香山寺

金山寺

華嚴寺

嵩山謁二程先生祠志感

宿悅上人禪房

流杯亭小憩借趙太史

流憩亭望見西湖

來青軒臺省諸公小憩

贈美人吳絲裙



既登岱夜集郭外訓唐僉臬二首

松石齋集卷之二

海虞趙用賢汝師父撰

五言排律詩

便殿奏事

上念跪久降座以手引起又蒙 天語嘉歎久

之紀事一首

謁帝金華近承顏玉陛隆康哉希舜詠咨汝企

堯衷曲跼明臣禮垂援俯 聖躬負依 天語

切引袖御香通虎拜文磚肅龍趨黼座雄袞嘉



榮 帝命吁咈荷皇風宣室恩稱異平臺禮獨  
崇元良非一德端揆謬三公何以訐謨協能諧  
熙載忠唐虞身幸際周召績無同翊亮資明運  
憂危佐 聖冲所希常道泰千載慶遭逢

郊壇扈 駕 賜觀齋宮温室 賜金椰

瓢銀八寶紀 恩

聖主肅郊祁天行日馭移旌旄元隊合冠劍上  
公隨法駕叨倍列靈壇屬仰窺何如宣室召得  
與闕宮儀殊錫珍金錯承恩麗玉拜鏤文光貫

鼎寶氣耀懸藜位直台衡重榮沾雨露私誓將  
精白志歲歲格 皇祇

奉贈肖甫張大司馬

聖世篤元臣千年瑞檢新降精元自蜀爲翰寔  
生申名羨回奇早才稱董賈倫河陽花作縣粉  
署玉爲人體國心先著匡時策屢陳安危皆報  
主文武摠調鈞四佩登場印三垂淨虜塵昔時  
南服靜今見北夷馴息望歸黃闥疇咨眷紫宸  
中樞喉舌冠端揆股肱鄰貝帶榮頒玉雲袍寵



木石齋集 卷之二 三〇四  
錫麟百僚師肅穆九命益逡巡衛武多憂日營  
平未老身果懷經世術不愧濟時屯海內知司  
馬行間戀寇恂含舖如下士開閣豈平津魚水  
超千載旂常炤萬春所希光史籍今古仰嶙峋

壽徐相公二十四韻

聖曆光熙洽星精降甫申將維一代運故眷百  
年身德以匡時重功因濟世神鵠鸞高譽望魚  
水契君臣惟昔中興盛毘茲下際仁 先皇咨  
密勿末命寄噸呻景曜扶重起洪鈞力轉新萬

機康改革九命益逡巡廣學惟論道開誠在後  
人於今寧海宇猶是藉陶甄平格天宜壽華夷  
誦並臻東山思謝傳四海望平津瑞靄紛成綺  
卿雲鬱若輪山川標氣色日月隱嶙峋桂樹騫  
三鳳蘭堦繞八荀留侯元不老鄴相果殊倫異  
數昭 皇寵溫綸出紫宸天衣五采麗法酒上  
方珍 天存問趨羣吏賡歌協衆賓師賢聞往哲  
褒德及茲辰下士勤推轂非才濫吐茵銜恩攄  
咏藻紀壽頌冥椿玄圃仙花艷瑤池碧醴醇武



公年未艾抑戒願重陳

少林寺

靈岳天中表香臺象外樓客行青嶂裏寺與白  
雲齊寶笈深龍藏金繩度鳥梯慧燈承日朗聖  
草銜堦淒王舍留中震耆闍去竺西虹幡初地  
繞鳳剎化城低巖鴿窺禪下天鷄望曉啼慈雲  
彌法界定水見真倪五葉開仍秀三花采欲迷  
願乘清淨力常得駐招提

贈石少司馬

司馬盛才名中樞佐上卿風雲酬國士文武濟  
時英直諫危青瑣孤臣意屢驚雄謀占赤羽報  
主膽逾傾郡國胡威譽朝廷汲黯聲露恩深

睿眷風采儼孤貞罔牧稱淵塞臺綱善肅清諸

艱方納麓歷試會持衡短語堪施餌長心尚請

纓勛將彝鼎列政格泰堦平壽紀初開曆靈源欲

降精微才承渥惠虛忝問窮生道以升沉合恩

從顧盼榮江湖收涕淚廊廟叶歌賡佇待銘功

日康哉咏聖明士盛二十四諸樂星賦少



贈答南海曾士鑑二十四韻兼呈趙少宰  
 誰謂棲遲者歸來復國楨本超湖海性盛鬱古  
 今情詞采凌南國才華絕二京上林空荐賦入  
 洛祗虛名寂莫憐楊子天人負董生初衣鮮薛  
 荔載筆潤瑤瓊豈念辭秦泣還尋訪戴盟舊京  
 旋白社嘉客欵春卿曾時客趙少宰所漫滅懷中刺沉  
 冥匣裏萍聊懽投轄賞暫緩越吟聲妙酒時參  
 聖玄言足醒醒秦淮虛夜月燕趙幾經行自管  
 登臺勝于今有鳳鳴物情多慘澹古道在堅貞

綿薄官成拙風期思獨縈贈言披藻詠投分托  
 蘭蘅濟世無舟楫匡時必宰衡遺弓應不恨抱  
 壘欲辭榮寥廓終翔鵠翻飛可掣鯨五噫予自  
 適十上子非輕日麗珍珠市春回碧玉城嶺應  
 付信江柳待含英何以敦岐路淒然步檐楹因  
 君夢鈴索離思咏南征

李權曹啓鑑荷亭新成有作

傲吏盛才名開亭傍錦城地幽人境別心達俗  
 塵輕荷氣當軒度蓮香逐酒行岸花交雜樹汀



柳亂流鶯徂暑羣芳秀含風夕景明水雲寬汎  
灑鷗鷺狎澄泓上客邀呼酒臨池賦濯纓誰言  
塵市裏亦自有蓬瀛

秀上人自真州將至峨眉

杖錫去翩翩峨眉到幾年故山雙對下半偈一  
燈傳昨日揚州信秋期漢口船禪心本不住真  
境故無邊月古湘江湛雲深蜀道縣清機隨鉢  
履寒梵足松泉待得同棲息皈依共法筵

五言律詩

題雲棲寺

精舍雲陽好莓苔一逕蕪綠陰巖際合黃鳥谷  
中呼投足聊停策行吟且據梧亦知塵外意驅  
馬復征途

輟輟嶺北望

迢遞輟輟道山盤路幾重川明分洛水樹靄見  
嵩峯車轍餘周漢民風識邶鄘龍門烟霧裏極  
目是秦雍

贈道人崔清言



吾愛清言子癯然土木姿朝餐供石蕨夜嘯對  
山魘一壑心常住孤雲意與遲待尋南岳去訪  
我碧江湄

陽臺宮作是司馬子微成道處

天隱巢居處連峯入奧區白雲辭帝闕青鳥會  
仙都月冷猿聲斷松虛鶴影孤此中消燕坐何  
必問蓬壺

秋日偕韓存良吳子道二太史游西苑在  
詩見投奉和得十首

方駕游何許晨趨紫禁遲遙原浮雜島遠水漾  
輕颺宮闕超皇覽江湖有釣絲帝京誰盛藻謝  
眺有新詩

直省金華接陪遊御苑同臺虛臨太液道復繞  
離宮寶帳三千所珠簾十二重何勞問玄圃身  
擬駕飛鴻

昭和南合殿苑南有昭和殿天際隱樓臺龍軸分巖出

鯨池對壑開樹銷金掌露塵歛玉堦苔輦路經  
行處猶傳歌舞回



峇堯紫光閣藹藹却雲烟玉牒千尋起璇題百  
尺縣淒清鄰上界縹緲御羣仙先帝遺弓在  
龍髯杳日邊

白水瑤扉麗芙蓉萬頃紅金鰲吹作雨玉竦矯  
成虹花氣通翔鳳林光淨射熊鴛鸞亭上望雲  
霧阻南宮

銅龍初盡漏綺騎結晨游左掖窺天近南臺見  
月留披襟連紫禁歸夢起滄洲帝里偏承賞寧  
悲宋玉秋

紫府臨丹地金壇駐五雷

中有五雷殿

受符芝蓋下

傳訣羽衣來明月千門閉飛雲五色裁徒聞歌  
太乙誰得儷仙才

先皇勤稼穡內苑落西成玉峽喧雲碓蘭塲駐  
火耕如逢天樂下將逐海槎行今日歌無逸千

秋仰

聖明

芬芳禁林晚天宇隱霏霏翠幌偏臨戶金屏別  
掩扉御溝分鴈苑仙榭出魚磯文史陪游地行



歌咏帝輝

清切聯三益趨陪托二賢秋雲低苑柳寒露咽  
宮蟬仙侶彤樓集瑤文彩筆傳今朝盛游宴何  
處與鈞天

朔日早朝

九秋傳朔氣萬國擁宸旒寶幄祥雲繞珠旂  
瑞露浮衣冠周禮樂拜舞漢王侯願效呼嵩祝  
堯天化日侔

晚渡衛河

不識澶淵路今窮渭水源野花低歷岍汀樹遠  
連村馬飲春流急人歸夕渡喧客行殊未已明  
月逐征軒

送傅大理之南都

獨持一尊酒相送白門人窮海十年戍孤臣萬  
死身寸心猶許壯華髮未悲新明日燕郊路征  
車渺後塵

奉使出都宿潞河寄別故知

擁節下彤闈分携限夕暉林開迴騎影花靄宿



巖扉潞水清添漲燕條綠抱肥回看暮雲盡心  
折故交稀

奉和張學士洪陽先生閑雲館詩八首

獨好林中隱閒雲孤館多道心澄索莫生事澹  
蹉跎檻外匡山合城邊章水過一丘雄自擅塵  
世幾勞歌

非關卑宦薄祇是惜時窮湖海歸人老烟波隔  
夢中看心孤月滿對影萬緣空羸得柴門下蕭  
然太古風

高館闌無人清虛見太真持將鑿坏意坐隱據  
梧身閒逐風花戲孤邀海月親逃津如有悟端  
不恨長貧

先生高卧處五畝足幽居日夕西山氣何如挂  
笏時白沙留野竹青靄斷寒漪風景前林好無  
妨倒接離

吾廬真自愛無事應今朝日月跳丸甚江湖戀  
關遙憂時成鹿馬任達適鷓鷯倘憫蒼生望弓  
旌好自招



迢遞蘅門下白雲當戶行人皆憐鷺序吾自宿  
鷗盟曉月清江渚浮雲遲苑城一龕相對處天  
竺古先生  
朝市厭喧喧紅塵隔故園羣星低草墅踈雨曠  
江村不媿東山卧常傾北海樽寸心持未斷祇  
是報君恩  
一榻結幽心窓閒水竹深人間難白地世路只  
黃金伏策希巢許遵塗逐向禽漆園無傲吏古  
道竟誰尋

送蕭給事使封琉球

萬里故人別滄波杳莫期檣鳥迎日舞水豹避  
風移玉帛通羣貢輜軒賁遠夷扶桑到應近爲  
爾挂弓時

送陳錫玄文學之南雍

裘馬金陵去翩翩入洛才摠緣悲窳逐重念爾  
蒿萊早路侵星赴園橋應月開國工堪辨玉披  
偈不須哀

潞河留別張以孚張時左遷待補



相見復相別潞河春水深孤臣一掬淚去國兩  
鄉心古岸留冰氣寒沙宿夕陰不堪頻北望離  
思日駸尋

平原留別曹戶部

故人齊地主相送及河干不分枯骸屬猶承握  
手歡輕烟春柳弱新火曉厨寒未必酬知己休  
彈貢禹冠

送寬上人

傳經雙樹下一錫老空林以我初禪意依公獨

覺心坐聞清梵發行處白雲深想到千峰裏烟  
霞不可尋

林居

自得端居趣深林獨掩扉片雲驕樹色一雨澹  
湖暉寂寞玄知是文章老覺非唯應狎鷗鳥與  
我對忘機

阻雨大河宿塵上人禪院

維舟問野寺風雨入門深一榻禪中意孤峰江  
上心久喧非馬辨暫據槁梧吟向夕聞經罷松



松石齋集 卷之二  
三  
窓半月陰

焦隱士祠

佛土朝暉淨幽亭野氣深秋風吹一葉彷彿聽  
鳴琴不以黃虞聖誰操箕穎心蒲輪徒漢使空谷  
有遺音

早發寧陽

麗日融嚴序行車媚旅客路隨寒鴈盡山合野  
雲重古寺掩殘月關門初曉鐘平生慕真侶於  
此企仙踪

晚過碧雲寺

初地何年寺金銀涌法輪林香搖積雪花雨浥  
輕塵息影消羣慮觀生幻一身夜深孤籟發天  
末動青蘋

謝尉氏令

赤縣神明宰相逢古尉城暮雲千里色孤月片  
時情幾處桑麻地新添雨露聲同歡雖可戀其  
奈迫王程

玄谷寺題贈方乘老僧



杖策憩東林縈紆澗壑深幽崖泉自落峻嶺日  
長陰貝葉翻僧律蓮花淨梵音乘公跌坐處草  
色映堦侵

謁夷齊廟

虛廟遺孤竹當年憶採薇君臣倫不廢湯武事  
猶非衰世黃虞沒空山虎豹威酌泉心可勵徒  
此挹清輝

會亭驛阻雨

積雨晝陰陰蟬聲灌木深弃繻當日事握節壯

游心孤吹月中細一燈風後沉羈情何所寄留  
滯托微吟

天津逢沈太守

乘海有高士杜門來故人黃金辭出守白髮慰  
慈親遠岫烟中景平沙雪後春自言行樂地修  
竹一閒身

早涉伊川南歸

方舟伊水上遠渚洛城東予亦栖遲者滄洲意  
不窮薄游非郢客歸去是梁鴻畢竟衡門下心



期誰與同

送潘去華理郡温州

幾年洙泗客結綬欲東游去路燕雲晚休衙越  
樹秋才高潘岳賦興入謝公樓遙想郡齋裏應  
多畫諾籌

送劉應楠郡理之永昌

萬里盤江道三秋擁傳過身趨雙節近山出六  
涼多到日驚西土頻年苦荷戈曾聞郡齋暇五  
袴幾徵歌

送刁宇和尚游五臺

東林初悟道禮佛到清涼去有巡臺侶來休幾  
日糧錫留吳地杳山入晉雲長月色中峰夜應  
憐舊講堂

丘齊之吾兼呈成奉和四首

開亭當粉署庭對對蕭森地以閒曹遠情因往  
哲深宮雲移旭日苑柳遍鳴禽獨抱幽人思千  
秋懷古心

爲郎聊復耳隱几故超然二子風流在遺文獨



松石齋集 卷之二  
可憐人疑雲上逸事愜草中玄振爾瑤華色相  
輝寔後先

尚憶空同子猶憐少谷才文章窺董賈詞賦列  
椰枚昔是經行地今成往事哀何人燕市裏鞭  
弭爲君開

羨爾文園客青雲起大名人今稱二妙吾欲並  
三生跡遠心逾勝官閒詩更清市朝容吏隱應  
不獻承明

賦得露零仙掌

靈液夜霏霏金盤曉未晞承雲濡玉潤委月汎  
珠暉仙掌雙莖擢神膏五色飛琴蕭歌帝澤長  
得奉宵衣

玉泉寺觀魚

路轉千峯仄藤廻一逕深泉聲咽危石鳥語靜  
高林自識非魚樂緣除害馬心塵纓那可濯于  
此遂招尋

三竺

三寺連天竺鐘聲杳上方雲搖幢影度石老徑



痕荒歷寂窺諸相  
拔援撫衆芳  
筍輦行欲暮  
烟月照蒼蒼

贈醫尤生

賣藥長安市  
人言是伯休  
得錢即沽酒  
無月不登樓  
玉篋丹經秘  
金膏寶鼎流  
千秋醫肆內  
誰副賈生求

送劉生還天長時予將赴闕

少年輕作別  
老大重爲歡  
念子河關遠  
嗟予行役難  
山臨瓜步盡  
潮落廣陵寒  
莫問南來雁  
三

秋獨爾看

毘陵道中家弟餞別

簫鼓夜闐闐  
星河近接天  
相看去留意  
共盡酒杯前  
鴻雁歸霜白  
年華促鬢玄  
池塘何日夢  
秋冷不成眠

登江天閣同送別諸友

江天鬱渺渺  
飛閣倚層阿  
萬里流不極  
寸心將奈何  
雲光浮白馬  
山氣疊青螺  
明日眞州別  
驪駒莫浪歌



仰雲詩

林臥寡所營悠悠澹世情孤雲本無迹吾意亦  
何縈夾日龍文動垂天鳳彩明滄洲堪極目千  
里暮山中

半塘寺訪圓上人

不遠西林舍蕭然出市塵龍函虛海藏寶鐸振  
風輪欲辨空同相應憐幻是身因公棲息處從  
此會迷津

香山寺

一踏香爐石王城遂渺然古松斜遶徑秀嶺半  
藏天此地非靈境何方有淨緣林端清磬杳真  
氣識初禪

金山寺

相將下翠微乘興款禪扉巢燕窺人語巖花點  
客衣梵音聞處處境想入非非予亦甘栖隱何  
年白社歸

華嚴寺

谷寺傍湖濱  
苑花開錦雲  
客來孤磬發  
僧定淨



香聞積蘚侵碑字虛函散貝文一乘微妙理驅  
馬厭紛紛

嵩山謁二程先生祠志感

雲下嵩陽院丹青式二賢名從濂洛重道爲孔  
顏傳世故今如此古人誠渺然千秋嚴俎豆祇  
誦在遺編

宿悅上人禪房

一榻下禪林偏怡靜者心高齋今夜月獨臥碧  
雲岑澗水侵苔合松蘿入戶陰人天栖宴寂吾

欲遂抽簪

流杯亭小憩借趙太史

有來梁苑客同被洛川流柳葉金溝暗桃花玉  
洞浮幾人休沐暇得與永和游坐惜烟霞暝風  
塵物外收

流憩亭望見西湖

架嶺沈寥天幽墟生紫烟窗啣鳩觀月岩寫鹿  
門泉目盡天南雁心歸湖上船風塵那可望真

姚小山篇



來青軒臺省諸公小憩

高閣倚青冥羣公擬聚星春風吹草色萬里入  
虛亭芝蓋迎烟合山雲傍檻停飛鴻跡可慕心  
目杳然醒

贈美人吳絲裙

欲解絲成積慙薦下裳同心曾約帶交股合  
生香影逐湘波豔嬌回洛水妝何如羅襪裏日  
得比容光

既登山夜集郭外訓唐僉臬二首

尋山初稅駕才夜此開尊氣挾霜臺烈顏飛黍  
谷溫巖更催候火暝色合孤村共洽林塘興相  
將下石門

公府日休暇主人借旅游雲當三觀出月傍五  
松流岫路有同調風烟憐素秋津亭莫相問離  
思迥滄洲

松石齋集卷之二 終



松石齋集卷之二

松石齋集卷之二

松石齋集卷之二

松石齋集卷之二

松石齋集卷之二

松石齋集卷之二

松石齋集卷之二

松石齋集卷之二

松石齋集卷之三目錄

七言律詩一

恭題 皇上所御画扇二首

詠鶴鴿葵蘭二花

詠白燕梨杏二花

恭謁 長陵

陪祀 昭陵紀事有作

平古田奏定

宿 昭陵齋房呈溟南趙館丈

松石齋集 卷之三



昌平道中望天壽山作

鷄鳴寺逢舊居停主僧作

送徐秀才暫還丹徒省母

至日齋居奉和王大宗伯韵二首

雪中艾鴻臚見過話舊作

送趙少宰汝邁北轉仍兼學士二首

送王侍御勉仁擢憲副廣左

長至日齋居署中聽演太常諸樂和王

大宗伯韵

來崔詩 有序

送艾純父擢太僕暫平江

送趙文明學憲之任河南 有叙

秋盡喜熊叅軍茂初至二首

題徐州張水部迴瀾亭

元宵夜徐伯繼吳子道丁右武鄒爾瞻

同集小樓作時予移疾請告方有還

山之興

范侍御言事落職時予以病請假賦此



申送

大司馬銅梁張公奏捷薊鎮加恩宮

保投贈

滄洲許使君夜讌南川樓

濟上逢曹太守之京口曹先爲侍御嘗

因薦予坐忤出守

天津王使君汎舟長河言別

病起

送太僕卿沈純父南還樵李二首

正月八日客有遺予梅花者因談丁右

武往事愴然賦此時丁方在滁陽

送沈工部少卿予告還吳

送江南仲山人還歙縣

黃家渡阻風

訓大總督劉公

舟中即事

夜泊梁店見月

青原關別易戶部



送朱太史封衡藩便道還越

送李翰撰冊封蜀府

送劉太史封秦府

送劉翰檢冊封靖江王府暫還番禺

送史戶曹督餉江西

送童揔戎督運事竣暫還京口

送丘齊之出守潮州

聖駕入自南郊受朝 皇極殿紀事

送徐伯繼謫太平知事

送王侍御視鹺兩淮

除夕寫懷

玄墓山和申相公韻

宿遷道中寄懷管比部

送熊茂初再調江西闔幕二首

送余山人還吳便道將登太山

周元孚過訪話舊作

別周元孚作周時被譴歸楚

贈北溪吳翁



送吳侍御滿告還臺

吳氏園作

吳子道席間示感懷作次答二首

寄唐禮部玄卿

登境山作

雨後聞鶯

雨霽由萬松嶺玉月岩少憩

壽閒溪黃翁七十

松石齋集卷之三

海虞趙用賢汝師父謨

七言律詩一

恭題

皇上所御畫扇二首

花鳥芳菲禁苑中畫圖省識見春風香飄蘭氣

千莖碧日麗葵心萬朵紅當暑移來看皎潔自

天題處轉青葱鵲鴿原上休相急已荷 皇仁

祝網同



右詠鵲鴿葵蘭二花

春城駘蕩日初長  
白燕雙飛度苑牆  
千樹曉霞迷杏艷  
一簾晴雪泛梨花  
迴風舞共花爲雨  
帶月看來羽作裳  
莫向昭陽營舊壘  
君王原薄漢宮粧

右詠白燕梨杏二花

陪祀昭懷紀事有作

瑤壇晴雪淨春空  
劍佩聲沉苑路東  
霜露每勤憂聖主  
貂璫無復肅齋宮  
通原燎火分宵白

拂樹霓旌映曉紅  
寂寞翠華誰望幸  
惟餘金粟鳥呼風

恭謁長陵

天險居庸壯帝京  
文皇曾此駐鑾旌  
雲生碣石圍龍障  
河起桑乾繞鳳城  
欵塞幸無南牧馬  
留屯可解北門兵  
橋山弓劍千年在  
終古常瞻王氣明

平古田奏捷館選第一

皇威赫赫耀天兵  
南指樓船百粵平  
萬里蠻烟



松石齋集 卷之三 二 六十五  
開象郡三秋海色淨羊城 廟謨自協周宣曆  
嶺徼誰傳漢武名聖澤於今沾異域凱歌直欲  
繼堯賡

宿昭陵齋房呈滇南趙館丈

先皇原廟俯層陰肅穆祠官奉御心月露夜零  
千嶂曉風泉寒咽九龍吟空傳遺帛留園寢猶  
想鳴珂直禁林繡草宣臺何日事侍臣唯有淚  
沾襟

昌平道中望天壽山作

鬱葱佳氣滿燕山望裏諸陵紫翠間玉闕南陵  
雄漢寢金墉北拱固秦關千峰馬首懸如曳九  
廟龍髯邈可攀一自宮車承輦路至今流水鎖  
潺湲

鷄鳴寺逢舊居停主僧作

廿年曾憶此經行月落香巖夜更清半偈不留  
題壁恨一燈猶向舊龕明雲深竹色迷蕪磴花  
覆春陰傍苑城自是塵勞久羈役可容相對說  
無生



送徐秀才暫還丹徒省母

憶得傳經共降帷諸生此日獨相依孤帆乍隔  
三山雨慈母還將九月衣浦口潮聲行處合江  
門柳色望中稀陳蕃正解南州榻可道停雲黯  
不飛

至日齋居奉和王大宗伯韻二首

展禮明靈肅譽髦望中雲物轉東臯齋心露禱  
同三事卜夜星文聚六曹風細銅烏宮漏永月  
明鳩鵲禁城高遙知宣室祈年意宵旰應勤

聖主勞

粉署香沉紫閣烟齋居午夜欲忘眠青郊尚憶  
陪瑯輦白雪仍聞倡木天向曉觚稜迎日麗辭  
寒梅柳映風妍登臺更切蒼生念榻管祔書大  
有年

雪中艾鴻臚見過話舊作

高館風威挾雪寒夜深相對酒容寬十年別爾  
逢傾倒四海何人有肺肝闕下生還身似夢關  
西戍老淚堪彈梅花幾樹南枝好幸得清閒寄



此官

送趙少宰汝邁北轉仍兼學士二首

舊京曾插侍中貂歲晚徵書下紫霄步履星辰  
聯八座文章山斗重三朝花明玉署春初曉路  
入官河柳正嬌到日鑿坡應召對鹽梅何計慰  
均調

明光奏賦第三人曾向羅浮試采真南國再逢  
新詔命北扉重入舊詞臣石頭歌散憐同調浦  
口帆移送早春朝有老成宗社福可令霖雨負

經綸

送黃侍御勉仁擢憲副廣左

西臺執法幸彈冠直道能容世所難囊裏諫書  
猶未展嶺南除日已先看離筵雪色鍾山杏別  
路驪歌玉樹殘解道平津開閣處如君若箇在  
朝端

長至齋居署中聽演太常諸樂和王大宗

伯韻

漢家祈祀重汾陰南省端居法宇深金石盡諧



韶濩律公卿虛忝肅離心如聞仙馭空山杳猶  
想鈞天舊日音宸極此時多氣象周廬千騎午  
森森

來鶴詩

有序

南省中舊有雙鶴忽失其偶余與大宗  
伯王公當夏至齋居日方演太常樂舞  
乃有一鶴橫空而墜雌雄應和比翼軒  
階昔人有鼓音而二八並集感孝而一  
雙來下方之斯美未若其諧合之奇也

王公枉詩見遺輒和元韻奉報此篇用  
致祝望之意云爾

南宮松檜偃離奇獨鶴翩然憇所思解識月中  
孤影恨來從舞後兩堦儀稻梁謀愧虞羅遠江  
海情懸刷羽遲爲報春卿消息至騫飛那敢並  
心期

送艾純甫擢太僕暫還平江

一疏曾同九死餘青山無恙又離居洛中諸貴  
紛投石輦上何人更引裾尊酒再傾燕市筑緘



書重覓武昌魚未應數馬堪消日托諷知君薦  
子虛

送學憲趙文明之任河南

有序

往丁丑之冬余與子道吳兄伏闕言事  
被杖落職幾死者數矣文明時以待御  
按部江西具疏申拯疏且投而會有阻  
之者不果上其事頗洩當事者甚銜之  
文明意不自得乃移疾請告竟用忤旨  
當左遷杜門林居不出逾四年歲癸未

春文明起家由衛輝理官入為職方郎

而余與子道從田中召復還侍從再會

都門黯若夢晤未閱月而文明有督學

中州之命復當言別慨聚首之無幾惜

妄言之寡契爰申別詩暢我離緒云爾

追隨曾是舊詞垣冠蓋中州爾獨尊齊魯橫經

原絳帳鄒拔授簡故梁園驚心往事看投石抗

疏何人擬叩闈遙想舉帷嵩少裏西風秋色

滿行軒



秋盡喜熊參軍茂初至二首

十年顛顛嘆離居吳蜀相望萬里餘爾去幕中  
猶作吏予從几上幾爲魚微官邴曼還除目頌  
酒劉伶莫荷鋏落落乾坤誰獨醒可能青眼對  
君虛

其二

聞道驅車自捷爲入門容髻笑支離秋雲摠識  
時人意夜雨重來故榻思衰敝游燕緇欲化文  
傳喻蜀檄仍奇開尊莫負西山色岐路逢君更

幾時

題徐州張水部迴瀾亭

仙吏風流畫省過平臺秋色淨無波窺人月借  
瀟湘近拂檻雲生嶽麓多共道梯航連上國徒  
聞壁馬日沉河只今誰障狂瀾力獨立中流奈  
爾何

元宵夜徐伯繼吳子道丁右武鄒爾瞻同

集小樓作時余移疾請告方有還山之

興



春衣初典鷓鴣裘海內談宗此一樓燈彩焰分  
雙闕麗月華星傷九衢流鄴中詞賦徵高會洛  
下冠裳屬舊游總道風光饒帝里吏情終不似  
滄洲

莫怪相過駐馬頻爲憐佳景動芳辰高齋尊酒  
同今夕諸子才名托後塵燈火千門良夜永鶯  
花九陌故園新宵衣想到宸遊處玉燭應調萬  
國春

范侍御言事落職時余以病請假賦此申

送

病裏愁多鬢易華聞君南謫轉堪嗟春風不下  
窮途淚夜雨依然處士家文帝豈能忘側席賈  
生終合召長沙自憐潦倒耽微祿徒倚斜陽聽  
晚鴉

大司馬銅梁張公奏捷薊鎮加恩官保投

贈

紫泥初下冊元功兼秩恩歸上相崇樽俎自堪  
羈老上烽烟那得照回中冰橫曉渡胡兵遁陣



繞陰山獵騎雄慚愧書生徒橐筆祇從江漢咏  
車攻原不無天也兼州因謂

滄洲許使君夜讌南川樓

樹裏行廚簇晚烟南樓晴色泛長川共嗟分手  
紅亭日猶憶披襟白社年汲黯慙能嘲布被桓  
寬論豈析緡錢使君嘗以書諫欵相并  
遺余鹽法條弊一卷夜深漁  
火沙頭滅涼月紛紛滿去船

濟上逢曹太守之京口曹先為侍御嘗因  
薦余坐忤出守

當年詞賦重西京驄馬行呼肅帝城烏去柏臺  
霜少色潮傾鐵甕夜消聲雲迷北闕心將往吟  
斷南冠眼乍明誰道陸機成薦後白駒空是繫  
時名

天津王使君泛舟長河言別

使君雙節建東瀛才斗千林夜不鳴秋水浮槎  
天欲近中流清嘯月初明帝鄉只隔烟波望歧  
路偏深戀別情最是征輪重江左何緣一借寇  
恂行



病起

隱几蕭條病後身  
西風忽報授衣頻  
青雲開閣仍披褐  
白石行歌自採薪  
書劍幾回傷獨往  
鱗鴻依舊候三春  
五湖何日扁舟去  
不向江東憶紫尊

送太僕卿沈純甫南還攜李二首

飄零去國淚重流  
逐客相携怨未休  
九死回天危抗疏  
七年窮海戍高州  
尊鱸正足湖南隱  
鴻鴈初驚塞北愁  
莫更沾襟念歧路  
滄江不遠舊

同游

潞水秋風客思饒  
中流擊楫候歸潮  
青山好在心猶壯  
白髮看多意轉凋  
不道當年還瘴癘  
却憐今日老漁樵  
烟霞莫負君恩重  
清夢時頻到赤霄

正月八日客有遺予梅花者因談丁右武  
往事愴然賦此時  
丁方在滁陽

旅客相思及早春  
况逢穀日旅愁新  
風高擊筑人初醉  
歲宴驅車雪滿輪  
疾惡最憐朱伯厚  
獨



醒惟見楚靈均  
淞陽雲樹三千里  
却對梅花倍  
愴神

送沈工部少卿予告還吳

水部才名冠一時  
為郎十載尚棲遲  
不緣黃閣無知己  
寧向青山問卜居  
帆落吳江人共遠  
月明燕市醉將離  
因君忽憶臨河岍  
携手秋風好及期

送江南仲山人還歙縣

乍來都市意何如  
顛悴初衣返敝廬  
采筆江淹

還賦夢名山禽向  
屢回車蟬聲極浦  
孤帆遠鴈影當秋  
片雨疎有約丹砂  
能鍊就與君相對  
繹玄書

黃家渡阻風

蒼茫雲氣隱孤檣  
風起橫波浪捲花  
近海魚鰕喧市集  
遠村旗鼓賽農家  
青萍匣在看將老  
白眼人逢好自誇  
去國果然輕似葉  
清明誰道即天涯

酬大總督劉公



授鉞三垂報主身至今麟閣讓功臣游旌乍出  
花間隊獵馬常嘶雪後春赤羽論兵猶矍鑠丹  
心謀國尚紛綸儻能詔起東山卧烽火還看淨  
虜塵

舟中即事

江浦新晴對落暉芳堤草色晚烟霏青雲漸遠  
名猶在白髮看多意轉違風煖檣鳥迎日舞沙  
清浴鷺傷人飛綠知世路如浮梗何事飄搖未  
息機

夜泊梁店見月作

藜林纖月媚清漪簫鼓中流晚更移幾度春風  
消客卽每逢寒食倍鄉思蹉跎涉世堪投筆今  
古浮踪似弈棋從此扁舟乘興去五湖三畝足  
棲遲

青原關別易戶部

三年兩度關門過地主逢君興獨長五石瓠甘  
題散木千金骨在識非黃天邊岳色侵衣碧樹  
裏鶯聲喚酒香河朔平原俱浪迹且容青眼縱



吾狂

送朱太史封衡藩便道歸越

主恩親遣重丹書東土新開帝子居負弩官儀  
雄海岱屬圖封事采青徐江濤晝靜迎潮館星  
氣宵隨入越車朝右須君持載筆可因傳檄滯  
相如

送李翰撰冊封蜀府

錦城天府漢諸侯使者桐圭萬里游結駟曾題  
司馬桂草玄重到子雲樓巴山路轉猿聲合巫

峽江寒樹影秋却憶瑤華披秀色新詩應寄浣  
溪頭

送劉太史封秦藩

青雲冠蓋出西雍王者親藩世五宗漢使自高  
公幹譽秦關原重伯翳封芙蓉半削金仙掌石  
月雙啣玉女峰想到天門搔首處秋風呼酒跨  
茅龍

送劉翰檢冊封靖江王府暫還番禺

侍臣朝散鳳凰池萬里封貂北極移桂嶺瘴消



松石齋集 卷之三  
開雨露銅標地盡識威儀故人燕市秋相憶驛  
使梅花春較遲君到莫言榮晝錦樓船猶有未  
班師

送史戶曹督餉江西

起草名推漢署郎新符遙佩度文章司農國計  
江淮急負海軍儲飛輓長落日諸峰看五老清  
秋高閣倚滕王到來紆畫東南事書疏應傳耿  
壽昌

送童總戎督運事竣暫還京口

將軍漳水下樓船粳稻東南大有年外府全齊  
來負輓中邦成賦仰幽燕雙旌曉挾秋雲轉萬  
馬寒嘶夜柝傳羨爾鳴珂榮舊里雅歌誰傷酒  
人前

送丘齊之出守潮州

幟帷南去古諸侯握手新知戀舊游白雪才名  
高執戟潢池兵氣寢援桴江瑤魚上蠻溪雨波  
蜜花時海郡秋想到行春榮露冕賜金重建壘  
書褒



聖駕入自南郊受朝 皇極殿紀事

聖主齋居帝若臨和風霽雨夜沉沉笳鏡萬吹  
迴金闕旌旆千群度羽林太一親郊周禮備回  
中通道漢宮深受釐不獨諸臣慶拜舞同歡四  
海心

送徐伯繼謫太平知事

風波一日世情新南去蕭條嘆逐臣季布謗先  
聞使氣朱雲直未許批鱗還將蒿目憂時事莫  
遂蓬心負此身君到凌歊臺上望江潭應有獨

醒人

送王侍御視鹺兩淮

八使名高執法中飛揚六傳海方雄廣陵濤壓  
臨江旆斃社珠懸照夜驄少府緡錢三楚倍牢  
盆杼柚大東空朱暉自有匡時策疏草旋應寵  
漢宮

除夕寫懷

四十一年今夜過椒盤栢酒聊倚歌半生勲業  
笑爾耳兩鬢歲月成蹉跎白髮無媒逕路少青



春作伴江湖多抗顏不惜戀五斗獨愧山中舊  
薜蘿

玄墓山和申相公韻

洞庭西望越山晴鳥外烟波重旅情萬壑松濤  
孤磬杳諸天香雨一燈明傳杯自愜高陽興避  
世無慚河朔名牢落平生媿招隱虛將短鬢拂  
塵纓

宿遷道中寄懷管比部

淮海東來紫氣浮白雲黃葉正高秋綈袍忽動

尊中意錦字難傳水上愁浪擁河聲淒夜柝月  
凌霜色到寒裘知君亦自憐行露把臂誰同汗  
漫游

送熊茂初再調江西闔幕二首

襤被蕭然下豫章可令時輩識行藏笑談欲絕  
青油幕名字曾高白玉堂側目總堪憂貝錦折  
腰真得類柴桑斗間莫犯雙龍氣未必豐城起  
夜光

曾共談天碣石宮重來慘淡舊游中披襟倘許



高陽劇授簡寧誇稷下雄  
燕市夜歌酣別酒章  
江春信候歸鴻主恩三  
譴還西土猶勝鞫  
駟語  
郝隆

送陸山人昂還吳便道將登太山

垂白詩名入洛年  
杖頭行色又翩翩  
符探漢策  
金泥秘觀指吳門  
練影懸夜雨江楓揚子渡  
秋雲菰米太湖田  
中林舊侶如相問  
謂報爲郎愧  
草玄

周元孚過訪話舊作

逢君初泛洞庭舟  
共說中朝戀舊游  
爲楚昔曾同  
趙客渡江今始得  
周侯飛蓬有問青衫淚  
短劍無歌白日愁  
良夜總拚酬酪酏  
可因杯酒托  
沉浮

別周元孚作周時被譴歸楚

片雨燈前夜色新  
淒涼舊事豈堪論  
難將疏草回寥廓  
漫有詩篇泣鬼神  
世路風波容易改  
天涯兄弟若爲親  
明朝遠作荆吳別  
相對江籬嘆  
逐臣



衡門高掩尚湖田忽報文星墮楚天肝膽乍傾  
杯酒後死生相憶復與前停雲賦奪千秋雪抱  
葉吟同五月蟬君到懷沙如有問衡湘歸鴈起  
聯翩

贈北溪吳翁

蕭然隱几類潛夫猶是高陽昔日徒名姓向來  
推任俠風流老去快呼盧紅襦半臂纏新錦紫  
玉雙笙按舊圖爲問扁舟行樂處西施載得五  
湖無

送吳侍御滿告還臺

使者霜威六月陰還臺舊是假抽簪皂囊猶鬱  
排雲氣白壁先驚按劍心路轉前旄江樹合杯  
行促膝夜燈深看君未少澄清意寧向明時並  
陸沉

吳氏園作

七月七日驕陽噓沿流出郭尋幽墟東郊園池  
興不淺西候稻梁謀豈餘短褐未厭銷骨口款  
段且逐下澤車吳雲蒼翠迥在眼奈可生事供



樵漁

吳子道席間示感懷作次荅二首

風雨毘陵對黯然  
逐臣容鬢總堪憐  
蓬心許自消扛鼎  
蕉夢從人未息肩  
殘暑日移蘿薜蔭  
空齋陰合桂叢圓  
莫言詩思愁中少  
片片瑤華落酒邊

病起青尊醉不迷  
狂歌忽憶舊中題  
側身平子愁偏劇  
落鬼莊生物與齊  
高舉上將慚遠鵠  
卑棲安得並連雞  
解顏今夕論心地  
好聽秋風鷓

鳩啼

寄唐禮部玄卿

十年詞賦愧齊盟  
漂泊相將第與兄  
從道子牟忘魏闕  
豈如嚴助厭承明  
石牀涼思分泉色  
松院秋深入雨聲  
携手莫言空谷並  
時名猶自擬弓旌

登境山作

青山古寺有叢臺  
松檜森沉一徑開  
平楚輕陰浮遠樹  
洪河排浪隱晴雷  
馬嘶孤嶺歸雲薄  
麥



松石齋集 卷之三 三十一  
秀空城落景催却憶江南最佳處黃鸝聲裏縱  
深杯

雨後聞鶯

流鶯哈哈柳溪頭候館晨鐘曉露稠不惜東風  
三百盞那堪夜雨一孤舟路傍偏結離人思枝  
上還驚少婦愁若到金門聞現睨啼爲春色滿

皇州

雨霽由萬松嶺玉月巖少憇

曲磴盤紆鳥道圍西陵樹色望中輝松風驟合

三山雨梅氣全蒸五月衣石上移尊偏晚興雲  
邊開榻下炎威滄江漫爾垂綸意誰伴雙星傍  
釣磯

壽間溪黃翁七十

紫綬恩來尚黑頭賓筵遺老重扶鳩香塵芳草  
山人屐白社封林酒客籌亦有歌鐘娛錦里更  
聞仙藥寄羅浮它年使者熊車入取次封章到

十洲



松石齋集卷之三 終

聞山... 日東... 又... 博... 尊... 隆

山人... 自... 却... 挂... 林... 既... 容... 壽... 亦... 有... 淵... 趣... 歟... 餘... 里... 更

紫... 絲... 恩... 來... 尚... 黑... 醜... 實... 致... 貴... 殊... 重... 井... 謝... 香... 壘... 芳... 草

上... 還... 壽... 間... 奚... 黃... 餘... 十... 十... 門... 間... 晚... 曉... 啼... 為... 春... 色... 滿

金... 謝

臺... 開... 財... 不... 炎... 氣... 創... 出... 巖... 爾... 垂... 餘... 意... 結... 半... 雙... 星... 尚

三... 山... 雨... 勢... 兼... 全... 蒸... 正... 月... 外... 香... 上... 蘇... 尊... 前... 如... 興... 雲



